

YUDA Ɔko Gɔ I Yuda Ɔtsere

¹ Ɔko gɔgbe ɔbɔre i mme Yuda kɔre, ngo nde Yesu Kristo rabaradze fie loɖe Yakobo ɔnyiibi. Nto lotsere lotã mma i bo Ɔse Ƴaa ɔkpere fie ɔse ɔɖɔe kukaako, ɔto ɔdzuẽ ma ɔse ɔtã Yesu Kristo.

² Ƴaa nnyainyo gu ã isobue gu kuɖɔe gɔ ɔba ɔtã mi si kusi kubua.

Itikpi To Iaba I Mila Maratedze Iso.

³ Wũ manyii ɖɔese, tee lobie sɔ si lotsere mi ɔko i kumego i Ƴaa ɔfo bo ɔɖuɖu ɔpia ngbã iso, ɣee ne, iba ianya sɔ loatsere ɔko gɔgbe losu lopia mi ɔle sɔ mikpẽ i kafɔkaɖe iti. Kafɔkaɖe ara ite wa i Ƴaa ɔsu ɔtã ã maturi ɔkpe ɔwẽ saã.

⁴ Alaso mawẽ ma loise manigã Ƴaa ɔɖu mabo i bo ndẽ i iwere ame. Mmagbe ɔɔfinikira Itɔme ne bofo i Ƴaa abualera iso makpesera ira mama si ikategu ma nsegbai nyanyarĩa. Masẽ bo Igarakpakpa ɔwẽ saã gɔ nde Bosate Yesu Kristo. Gbaã ne, Ƴaa mɔmɔ ɔɔɣe ɔse koko sɔ ɔtã mmagbe ipo.

⁵ Atoa sɔ miye ara wagbe ɔɖuɖu koko ne, lobie sɔ loanyigira mi sɔ Ƴaa gɔ mɔmɔ loɖi Israel kaɖe ɔbɔregu i sisande ame i Egipte karɔ iso ne, ɔwɔra mma loifo wũ maɖe i ɔwi kama.

⁶ Minyigi sɔ Ƴaa makpabo ma loibara ɔle gɔ matã ma karabara kukaako fie marui i ma kayakɔ ne, ɔpia ma kugbagɔrɔɔ ɔse ta ɔwi gɔmɔ fie ɔsu ma ɔpia i idududu kpirikpirikpiri ame sɔ

maawe i mmo gbogboogbo ðaxegu ma atõme otã ma ipo ku Iyi Tsora Siare nemo.

⁷ Ngbo ame si minyigi Sodom gu Gomora gu simagẽ dze loki silo ma ne. Sẽ maturi ose ngbã nyanyarĩa mađe asorõ lalaa go ta ma marerẽ to maregu so, ne oso Yaa osu oto go loise onyi otsuedza ma so maade ikparĩ matã maturi odudu.

⁸ Ngbo ame i mmagbe se masẽ are mabara ara nyanyarĩa i ma momo siturina iso ne. Maise makã Yaa ole go nto ode ma iso atsue fie mase maye anyakpi i mma nto mađe ma iso iso.

⁹ Yee Yaa Kpabokpakpa Mikael kora iibara ngbo. Jwi go mato mawararã so i Mose kpise iso so nna loasu wũ ne, Mikael iixe kuira nyanyarĩa i Jbosam iso ido so oyere wũ so, "Bosate si onyagalagu-o!"

¹⁰ Yee mmagbe se matiatia, magbarĩ ara wa karõ maino fie ara wa maye ta ma karõkasekõ le kumego ipo ame maboi yee kurodzai iixe kuira ne, wã ame loadoe ma ne.

¹¹ Ndzo mide mitã ma! Mase Kain nsegbai. Kusia go maana oso ne, mabebe ano fie mabara ixere le Balam awe. Mata maya maturi iso le Kora awe fie maawo ngbo ame.

¹² Si misakanya i kudoe ame mito mise oporõ katõ ne, mmagbe anuarera se akpese inyini isia mi iso. Ma onowẽ saã isoxo pe mase mabie. Mase le adodo wa i owiri sore okigu fie kado na i wã ame, yee adziri wa loise axõ abi nane kuse owi. Adziri wa maorui ta sidu ame fie okpi.

13 Makategu ɔpo ame ndu me nto mipe fie ma anuarera se le ɔpo ndu me nto mifu sirarã. Maɖe awami wa loiɣe kayakõ kawẽ, fie ʒaa ɔledza kasekõ ɔtã ma i idududu kpirikpirikpiri ame ɔwi daaro.

14 Mmagbe iso iɖe i Enok go nde Adam ɔɣekpare kɔdzeva ɔbi ɔɣe sɔ, “Bosate gu ñ makpabo kukpi kukpi to maba.

15 Fie ɔto ñaɣegu maturi ɔɖuɖu atõme. ʒaɣegu mma ɔɖuɖu loise manigã ʒaa atõme i ara lalaa wa ɔɖuɖu mabara iti. Idua i nwagbe iso ne, maɣegu makpibaradze ma loise manigã ʒaa atõme i anyakpi wa ɔɖuɖu maɣe i ñ iso iti.”

16 Maɖe maturi ma nse maɖe aka i ɔme ame, maɖi maturi matã. Mase mabara i ma ara nyanyarã wa nse akpẽ ma ɔkã iso. Mase maɖe ndamu fie mase masu ɔnyamerẽ masɔsɔla maturi si maana nne mato mabie.

Su So Sia I Kristo Iso.

17 ʒee mi wũ manyii ɖɔese ne, minyigi ara wa i Bosate Yesu Kristo katõmemasɛdze ɔɣere mi koko.

18 Maɣere mi sɔ, “I ayi tsɔra ame ne, maturi to maaba fie maabara mi aɣiãra, mabara ara wa nto ma ɔkã go maibanigã ʒaa.”

19 Ma nde mma nse manina maturi gu maturi inyɔ ndẽ ne, ma adzuni sia i kayiiso ara ɔnɔwẽ iso, fie ʒaa Siwarã na i ma ame.

20 ʒee mi wũ maɖese ne, mitã mi kafokaɖe ga nde ira sekelea si kamɔ kabua si mikparama kayi i Siwarã Bielea ɔle ame.

²¹ Mikola so i Ƴaa kuɔɔe ame si mila miɔnyɔ ɔri sɔ Bosate Yesu Kristo aanyɔ mi nnya ɔtã mi ngbã me nna katui.

²² Ma ndẽ mawẽ ma nto mawararã ne, minyɔ ma nnya.

²³ Mma nto mabo i ɔto ame ne, mipɛ ma mifo mipia i ngbã ame. Minyɔ mawẽ nnya, ɣɛɛ minigã ma nsegbai nyanyarã me loawo mi ɔpukutura.

Loto Lokparama Kayi I Mi Iti.

²⁴ Ƴaa gɔ loawo mi ɔmɔẽ ɔla sɔ miibarɔ fie ñako mi mila miɔna isoɔɔ gbɔgbɔɔgbɔ miase miabo ɔ ikpawai ame si ɔbara mi sɔ iɣere kuiwẽ iibawe mi iso.

²⁵ Ƴaa ɔwẽ saã gɔ nde bo Fɔdze iki i Bosate Yesu Kristo iso boasu kuware botã, bokɔle wũ kato. Ɔ ɔnɔwẽ loadɛ bo iso, ɔwe ɔle i bo iso, ɔwi biara ita i kinio ikpa ɔwi daaro. Si iba ngbo!

Siwu

Siwu: Ndamu Yεε Siwu New Testament

copyright © 2008 Wycliffe Bible Translators, Inc.

Language: Siwu

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

b5020a1a-c7b9-512a-9b46-1e462be571d4